

Il 10 d'avrel: Sogn Macari, patriarch d'Antiochia

Sogn Macari ei naschiu en Armenia da nobels e buns geniturs catolics. Sco padrìn da batten ha Macari giu igl arzustg d'Antiochia che fuva siu parents e che ha dau siu num dil batten ad el. Suentar paucs onns ha il prelat priu il buob tier el per educar en la tema da Diu, emprendre las bunas vertids e schar studegiar. Siu bien talent era cumpignaus da buns departaments che han gleiti schau enconuscher ch'el seigi in eligiu da Diu per survir alla Baselia catolica. Cura che Macari ha giu cumplenu la vegliadetgna necessaria eis el vegnius consecraus spiritual e daventaus in augsegner virtuos e perdet e stimaus lunsch entuorn. Siu padrìn igl arzustg fuva vegls e malsauns. El ha en preschientscha dils spirituals e dil pievel detg: Vus veseis che la mort stat avon miu esch per prender quei pauper vegl ord las miserias da quest mund. Jeu haiel prest da render quen al grond Bab en tschiel sur da mia administraziun. Perquei hai jei clamau ensemen vus per mias davosas instrucziuns e per recumandar memez a vossas oraziuns. Jeu bandunel vus e giavischel che vus elegies in bien successur che cuntscha ora mias negligentschas ed errurs. Sche jeu astgel dir, sche manegel jeu ch'il giuven Macari fussi dil tschiel ordinaus per vies pastur. Strusch ha il vegl Macari giu detg quels plaids che tut il pievel excloma cun aulta vusch: Gie, gie, il giuven Macari e negin auter duei esser vies successur. Sulettamein Macari leva buca dar siu consentiment, cartend ch'el seigi buca meriteivels. Suentar la mort da siu padrìn ha el lu tuttina stuiu ir sut quei buordi e quei per impedir auters disuordens. Vesend el che l'elecziun fussi gesta e fatga tras la vusch da Diu, eis el staus consolaus.

Tras quella dignitad ei Macari vegnius aunc pli humiliteivels. Quei tractat che sogn Paul veva fgatg sur d'in uestg, ha sogn Macari cumpleinamein cumplenu cun sia veta. Siu ardiment fuva ardents e discretse sia carezia per tuts. Pertgei il sogn vigilava e luvrava senza paus, fuva pussents en plaids e fatgs, perdegava mintgadi, visitava ils malsauns e gidava ils paupers cun almosnas. Las schliatas disas, ils vezis ed auter currigeva el cun plaids migeivels ch'il puccont saveva buca far encunter a sia veglia. Siu tgierp mortificava el cun grondas penetienzas, sevestgeva fetg mudest e viveva en in plitost pauper dacasa. El spargnava quei ch'el pudeva per saver parter ton pli bia culs paupers. Era urava Macari bunamein adina e quei cun tala devoziun ch'el saveva buca dir il Babnos senza bargir. Perquei purtava el adina in stratsch per schigentar giu las larmas. Publicamein vegneva Macari tenius per in sogn prelat e quei muort sias claras vertids. In leprus ha in di mess quei stratsch da larmas sin sias plagas ed immediat staus medegaus. Medemamein ein era suords, tschocs, schirai ed aunc biars auters vegni medegai miraculamein tras l'aua ch'el duvrava da selavar.

Muort las biaras miraclas vegneva sogn Macari fetg ludaus e stimaus, denton buca per siu plascher, pertgei el garegiava nuotzun da quellas caussas. Per fugir il prighel da curdar en vanagloria, ha el surdau il guvern da sias olmas ad in bien spiritual cul num Eleuterius. El ha partgiu ora sia rauba als paupers ed discussamein bandunau Antiochia per ir a Gerusalem cun aunc quater auters discipels che levan buca bandunar el. Macari leva restar nunenconuschiu, mo il patriarch Joannes da Gerusalem ha enconuschiu el e retschiert il patriarch cun gronda honur. Il sogn pelegrin ei buca ditg setenius si leu a Gerusalem, mobein ei ius per la Tiarasontga entuorn a visitar ils loghens sogns, bugnond quels cun bia larmas. La Palestina fuva lu per gronda part habitada da Saracens. Cun quels dispettava sogn Macari e converteva dabiars ed era gediis tier la cardientscha catolica. Tras quei ha el tratg sur da sez ina greva persecuziun. Ils nunfideivels Tercs e gediis han mess el en perschun, bastunau e maltractau el sin da tuttas manieras. Per snarregiar ses priedis e sias ductrinas han ils persecutaders stendiu ora el giun plaun en crusch, ligiau cun sughets peis e mauns e fermu quels cun detgas guottas vid il planschiu dalla perschun. Lura han ei tschentau ad el sil pèz in grond crap che fuva avon vegnius scaldaus zun ferm el fiug e lu sgomiau il torturau cun plaids. Quei tut sufrevia il sogn cun tala statteivladad che tut stueva smarvigliar. Diu ei staus cuntents cul desideri che Macari veva d'endirar per amur sia ed ha buca vuliu ch'el resti marterisau. Il tschiel tarmetta in aungel che sclarescha las stgiradetgnas da quella perschunia e confortescha il sogn en fermonza. Igl aungel ha admoniu da sefidar dalla protecziun dalla divina providientscha ed empermess che Diu vegni a dar ad el la forza da

puder contonscher la victoria en tut sias battagliais. Sin quei ei igl aunghel staus stulius ed il sogn sauns e libers dils sughets. El vesa la perschun aviarta, passa senza dubitar viado, engrazia a Diu e se presenta puspei avon ses persecutaders.

Ina miracla schi vesevla ha fatg smarvigliar buns e schliats che nundumbreivels nuncartents sefrevan giu avon ses peis, rugavan per perdun e garegiavan dad esser instrui per saver retscheiver il sogn Batten. Quei ha sogn Macari fatg bugen e suenter zacons dis ha el battegiu in grond diember da cartents. Cun ina autra miracla ha il sogn era convertiu ils restonts inimitgs. In Saracen numnadamein, naschius suords e mets e cun in maun schirau ei en preschientscha d'in grond pievel vegnius menaus avon sogn Macari. Il sogn semetta en schanuglias ed ura ferventamein. Suenter las oraziuns ha il Saracen saviu muentar il maun e retschert el medem mument faviala ed udida. Sin quei han tuts nuncartents leu radunai garegiu da vegnir battegiati. Denton han ses parents vuliu ch'el tuorni a Antiochia tier siu patriarc, seigi quei cun la buna ni cun la mala. Vulend ils deputai sfurzar Macari tiel retuorn ein els gest leu daventai tschocs e ch'els savevan era buca muentar la bratscha. Els sehumilieschan, rogan per perdun ed il sogn ha cun la cruscha ch'el purtava enstagl dil fest, turnentau ad els la vesida e la sanadad dalla bratscha. Suenter quei ei il sogn patriarc serendius en la Germania e sefermaus per in temps a Pejerland. Leu fuss el bugen seserraus en ina claustra per esser al mund nunenconuschents. Mo nua ch'el mava, palesava Diu sia sontgadad cun schar daventar da tuttas sorts miracles. Tras quei vegneva Macari tenius per in aunghel dil parvis che veva da Diu il dun da medegar malsauns, da far nescher fontaunas, da stizzar barschaments, da metter pasch denter inimitgs e da far auters benefecis per consolaziun dils carstgauns e per il salit dallas olmas.

Finalmein suenter biars e liungs viadis eis el vegnius a Gand, in marcu dalla Flandra e seretratgs en la claustra da sogn Bavone. Mo vegnend el leu zun veneraus ha el puspei vuliu turnar anavos en sia patria nativa, pertgei el saveva negliu fugir la gloria ed il laud dil mund. Mo Diu ha puspei fermu el cun tarmetter ina gronda febra sur da siu survient. Da quella febra eis el zuar vegnius liberaus tras sogn Bavone ed auters sogns che fuvan cumpari ad el. Mo da quei temps regeva la muria a Flandria e contuorn e raffava naven bia glieud. Macari ha rugau Diu da prender naven quei castitg. Sia oraziun ei vegnida exaudida cun schar saver che la muria cali si suenter sia mort. Il patriarc ei lu vegnius taccaus dalla muria e morts sontgamein en la claustra da sogn Bavone igl onn 1012. La muria ha ladinamein calau si. Siu tgierp ei vegnius satraus en ina grotta sut la caplutta da Nossadunna, la quala el veva sia entira veta venerau. Las miracles che daventavan lunsch entuorn han dapertut promoviu la devoziun tier sogn Macari aschia ch'el ei daventaus il particular patrun dalla muria.

Reflexiun

Gl'ei buca d'anflar in sogn che vess buca giu tema dad esser en honors, dignitads e gronds uffecis avon il mund. Lur raschun fuva quella ch'els temevan da semetter en prighel da curdar el puccau dalla vanagloria che sa vegnir numnada la ladernessa da tut il bien. Pertgei quel che vul plascher al mund vegn a displascher a Diu. Quel che enquera laud e honor piarda ils merets dallas bunas ovras. Quel che selauda ni vul esser ludaus dils auters muort sia perdertadad, sontgadad, sabientscha ni auters duns, quel privescha sesez dil meret che s'udess ad el. Cert ei che la vanagloria ei il pli gond inimitg dallas olmas. Per quei lein mirar da drizzar nies urar, cantar, perdegar e nossas ovras mo per ludar e glorificar Diu e suandar igl exempel da sogn Macari. Croiset. Villeg